

+ Susanna Duff-Beer, Sumvitg 29.10.1976 nr.86

Mo ina stretga gassa sparta las duas casas che miran en fatscha in'a l'autra a Cuntrin. Da quellas duas canortas han ils vischins della pleiv de Sumvitg e contuorn accumpignau egl interval de mo tschun dis dus cussadents al santeri, nua ch'els ruaussan ussa gest in sper l'auter. Negina gassa sparta pli lur canorta. Schegie vivi varga curont'onns aschi damaneivel in da l'auter, han ils dus defuncts Benedetg Candinas e Susanna Duff-Beer buca giu la massa enconuschienschta in da l'auter. Ferton ch'il defunct Benedetg ha adina giu in stretg contact cun la veta communbla e cun ils vischins dell'entira vischnaunca, ei dunna. Susanna stada in carstgaun retratg e bunamein isolau.

Igl onn 1938 marida la Susanna, oriunda da Tujetsch e naschida leu igl onn 1908, il giuven Cristian Duff de Sumvitg. La giuvna lètg secase-scha a Cuntrin en casa dil geniturs dil mariu. Enteifer ils onns parturescha Susanna 9 affons, dils quals 2 ein morts de baret. Quellas grevas fridas pon forsa haver dau alla Susanna in pli grond stausch vi en la retratgadad. Cun la mort dil mariu Cristian, igl onn 1964, ei la situazion buca semegliurada. La buna dunna Susanna ha giu de far atras in dir cumbat. Ils buns vischins ein segidai ton sco pusseivel cun la famiglia ed era igl assistent Alfons Casanova ei staus in bien sustegn per la vieua ed ils orfans. La direzia dil

destin ha lu aunc viliu che la dunnetta vegni sezza mulestada d'ina dira e stinada malsogna, che ha adina fatg pli e pli grond progress. En tuttas situaziuns haveva la defuncta per moda de dir: Nossadunna gida adina puspei mei. Sur dil far e demanar de quella femna havein nus udiu a scutinond ils suandonts plaids: Ina vera martira e mesa sontga. Tals ein era stai ils plaids che han stimulau nus de scriver quest necrolog. Oz crein ins buca bia enten sogns, e sche Susanna Duff-Beer ei era stada mo ina mesa sontga, sche ha ella segiramein acquistau il sogn Parvis sin l'auter mund.

Il grond til de bara dils 17 ded october ha demussau che la defuncta gudeva, malgrad sia retratgadad, simpatia e carezia tiels vischins de pleiv e vischnaunca. Era en sempladad san ins raccoltar simpatia. Quei che nus havein descret ei mo ina pintga part dellas grevezias e direzias ch'ein stadas cargadas si a quella bun'olma cristiana. Vegli Nossadunna remunerar sia fidei-vla veneratura dublamein. Possien era biars vischins seregurdar della defuncta en pietad e carezia.

La defuncta Susanna ruaussi en paisch sco ella ei vivida sin quest mund. Nossadunna gidi era Tei leuvi sco ella ha gidau Tei cheu sin tiara.